

È y' aivait, â long di poche, ène rûne de véye murat de pierre.

Tiaind qu' i rvenié d' mon traivaiye, lo djoué d' aiprés â soi, i ai vu dâs loin mon ptét prince sietè lienson, les tchaimbes pendaines. Èt i l' oûyôs que djâsait :

- Aidonc te n' t' en svîns pe ? qu' è diait. Ç' n' ât p' tot è fait ci !

Ène âtre vouû yi réponjé sains dote, poéchqu' è gronss'né (*répliqua*) :

- Chié ! chié ! ç' ât bîn l' djoué, mains ç' n' ât pe ci l' yû...

- Î porcheuyé mai mairtche vâ l' murat. Î n' voyiôs ne n' oûyôs djmais niun. Poétchaint lo ptét prince gronss'né de nové :

- ... Bîn chur. Te voirrés laivou ècmence mai traice dains l' châte. Te n' és ran qu' de m' y aittendre.

Î y' sraî çte neût.

Î étôs è vint mètres di murat èt i ne voyiôs toûdje ran.

Lo ptét prince dié encoé, aiprés ène coidge :

- T' és di bon poujon (*venin*)? T' és chur de n' pe m' faire è cheûffri bîn grant ?

Î fsé ène airrâte, lo tiûre serrè, mains i ne compreniôs toûdje pe.

- Mitnaint, vais-t'en, qu' è dié... i veus rdéchendre !

Aidonc i aibéché moi-meinme les eûyes vâs l' pie di murat, èt i fsé in sât ! Èl était li, drassie vâ lo ptét prince, yun de ces djânes sèrpents qu' vos éjétiutant en trentes sgondes ! Tot en fregoinnaint (*fouillant*) dains mai baigatte po en tirie mon révolve, i prenié l' pâs d' courche, mains â brut qu' i fsé, l' sèrpent s' léché coulaie, cment in djèt d' âve que meurât, èt, sains trop s' preussie, se faf'lé entre les pieres aivô in ladgie brut d' métâ.

Î pairvenié vâs l' murat djeûte è temps po yi rcidre dains les brais mon ptét bonhane de prince, biève cment lai nadge.

- Qu' ât-ce que ç' ât de çt' hichtoire-li ! Te djâses mitnaint aivô les sèrpents !

Î aivôs défaît son étrenâ coitche-nèz d' oû. Î y' aivôs moéyie les tempyes èt i l' aivôs fait boire. Èt mitnaint i n' oûjôs pus ran yi dmaindaie. È m' raivoété graîvment èt m' entoéré l' cô de ses brais. Î sentôs fri son tiûre cment çtu d' in oûjé que meurât, tiaind qu' an l' on tirie en l' échcarabine. È m' dié :

- Î seus hêy'rou que t' euches trovè c' que mainquaie en tai machine. Te veus poéyait rentraie en l' hôtâ...

- Cment c' que t' lo sais !

Î vniôs droit y' ainoncie que, contre tot' échpérainche, i aivôs grôtè mon traivaiye !

È n' réponjé ran en mai quèchtion, mains èl aidjouté :

- Moi âchi, adjd'heû, i rentre en l' hôtâ...

Èt peus, grietou (*mélancolique*):

- Ç' ât bîn pus laivi... ç' ât bîn pus mâlaîjie...

Î sentôs bîn qu' è s' péssait âtye de churpregnaint. Î l' serrôs dains les brais cment in ptét l' afaint, èt, poétchaint, è m' sannait qu' è coulait voirticây'ment dains in ébîme sains qu' i euche ran poéyu po lo rteni...

Èl avait lo rdyâd chériou, preudju brâment laivi :

- Î aî ton moton. Èt i aî lai caîse po ton moton. Èt i aî lai meûtliere...

Èt è sôrié aivô grie (*mélancolie*).

Î aittendé bîn grant. Î sentôs qu' è s' réchâdait pô è pô :

- Ptét bonhane, t' és t' aivu pavou...

Èl aivait aivu pavou, bîn chur ! Mains è rié bâlment :

- Î airaî bîn pus pavou ci soi...

- D' nové i m' seus chenti yaicie poi l' ìmprèchion de l' ìneurchiqûâbye (*irréparable*). Èt i comprenié qu' i n' suppoétchôs p' l' aivisaiye de n' pus djmais oûyi ci çhôri. C' était po moi cment ìn bené dains l' djèrt.

- Ptét bonhanne, i veus encoé t' oûyi rire...

Mains è m' dié :

Çte neût, çoli fré ènne annèe. Mon yeûtchîn s' troveré droit â d'tchu di yû laivoù i seus tchoé l' annèe péssèe...

- Ptét bonhanne, ât-ce que ç' n' ât p' ìn croûye sondge çt' hichtoire de sèrpent èt de reindèz-vos èt de yeûtchîn...

Mains è n' réponjé p' en mai quèchtion. È m' dié :

- C' qu' ât ìmpoétchaint, çoli n' se voit pe...

- Bîn chur...

- Ç' ât cment po lai çhoué. Che t' ainme ènne çhoué qu' se trove dains ìn yeûtchîn, ç' ât dou, lai neût, de raivoétie l' cie. Tos les yeûtchîns sont çheûris.

- Bîn chur...

- Ç' ât cment po l' âve. Çtée que t' m' és bèyie è boire était cment ènne dyîndye (*musique*), è câse d' lai rôlatte èt d' lai coûdge... te te svîns... èlle était boinne.

- Bîn chur...

- Te raivoét'rés, lai neût, les yeûtchîns. Ç' ât trop ptét tchie moi po qu' i te montreche laivoù s' trove lai mîn. Ç' ât meu dînche. Mon yeûtchîn, çoli sré po toi yun des yeûtchîns. Aidonc, tos les yeûtchîns, te veus ainmaie les raivoétie... Ès sraint tus tes aimis. Èt i t' veus faire ìn crôma...

È rié encoé.

- Ah ! ptét bonhanne, ptét bonhanne i ainme oûyi ci rire !

- Djeûtment, çoli sré mon crôma... çoli sré cment po l' âve...

- Qu' ât-ce que t' veus dire ?

- Les dgens aint des yeûtchîns que n' sont p' les meinmes. Po les uns, que voiyaidgeant, les yeûtchîns sont des dyides. Po d' âtres ès n' sont ran qu' de ptétes lumieres. Po ìn hanne d' aiffâires èls étînt de l' oû. Mains tos ces yeûtchîns-li se coidjant. Toi, t' airés des yeûtchîns cment niun n' en é...

- Qu' ât-ce que t' veus dire ?

- Tiaind qu' te raivoét'rés l' cie, lai neût, poéchqu' i dmoér'raî dains yun d' yos, poéchqu' i riraî dains yun d' yos, aidonc çoli sré po toi cment che ryînt tos les yeûtchîns. T' airés, toi, des yeûtchîns que saint rire !

Èt è rié encoé.

- Èt tiaind qu' te srés concholè (an s' conchole aidé) te srés aîje (*content*) de m' aivoi coéniu. Te srés aidé mon aimi. T' airés envietainche de rire aivô moi. Èt t' eûvrirés quèques côs tai fnétre, dînche, po l' piaîji... Èt tes aimis sraint bîn ébâbis de t' voûr rire en raivoétaint l' cie. Aidonc te yos dirés : « Âye, les yeûtchîns, çoli m' faît aidé rire ! » Èt ès te crairaint fô. Í t' airaî djû ìn bîn peut (*vilain*) toé...

Èt è rié encoé.

- Çoli sré cment ch' i t' aivôs bèyie, â yû de yeûtchîns, des moncés de ptéts griats que saint rire...

- Èt è rié encoé. Èt peus è rdevnié chériou :

- Çte neût... te sais... ne vîns pe.

- Í n' te tyit'raî pe.

- Í airaî l' aîr d' aivoi mâ... i airaî ìn pô l' aîr de meuri. Ç' ât dînche. Ne vîns p' voûr çoli, ç' n' ât p' lai poinne...

- Í n' te tyit'raî pe.

Mains èl était en tieûsain.

- Ì t' dis çoli... ç' ât âchi è cåse di sèrpent. È n' fât p' qu' è t' mouêjeuche... Les sèrpents, ç' ât métchaint.

Çoli peut mouêdre po l' piaîji...

- Ì n' te tyit'raî pe.

Mains âtye lo raichuré :

- Ç' ât vrai qu' ès n' aint pus de pouîjon po lai sgonde morjure...

Çte neût-li i n' l' aî p' vu s' botaie en tchmîn. È s' était envoulè sains brut. Tiaind i grôté è lo rdjoindre è mairtchait coéraidjou, d' ïn pås vi. È m' dié empie :

- Ah ! t' és li...

Èt è m' prenié lai main. Mains è s' toérmeinté encoé :

- T' és t'aivu touû. T' veus aivoi d' lai poinne. Ì veus aivoi l' aîr d' être mouê èt çoli ne sré p'

voirtâbye (*vrai*)...

Moi i m' coidjôs.

- Te comprens. Ç' ât trop lai vi. Ì n' peus p' empoétchaie ci cou-li. Ç' ât trop poijaint.

Moi i m' coidjôs.

- Mains çoli sré cment ène véye écouche (*écorce*) aibaindnèe. Ç' n' ât p' trichte les véyes écouches...

Moi i m' coidjôs.

È s' décoraidgé ïn pô. Mains è fsé encoé ïn éffou :

- Çoli sré dgenti, te saîs. Moi âchi i raivoét'raî les yeûtchîns. Tos les yeûtchîns sraint des pouches aivô ène rôlatte reûyie. Tos les yeûtchîns me voich'raint è boire...

Moi i m' coidjôs.

- Çoli sré taint aimusaint ! T' airés cîntyte cent mil griyats, i airaî cîntyte cent miyons de benés...

Èt è s' coidgé âchi, poéchqu' è pûrait...

- Ç' ât li. Léche-me faire ïn pås tot d' pai moi.

Èt è s' sieté poéchqu' èl aivait pavou.

È dié encoé :

- Te saîs... mai çhoué... i en seus réchponchâbye ! Èt èlle ât chi çhaile ! Èt èlle ât chi beurlandouje (*naïve*). Èlle é quaitre épainnes de ran di tot po l' aimâtaie (*protéger*) contre lo monde...

- Moi i m' sieté poéchqu' i ne poéyôs pus me tni drassie.

È dié :

- Voili... ç' ât tot...

È toujé (*hésita*) encoé ïn pô, èt peus è se r'yeuvé. È fsé ïn pås. Moi i n' poéyôs p' boudgi.

È n' y' é ran qu' aivu ïn djâne éyujon vâs sai tchvéye. È dmoéré ène boussè immobiliye. È n' breûyé pe. È tchoéyé bålment cment tchoé ïn aîbre. Çoli ne fsé meinme pe d' brut, è cåse di chåbye.